

Morning Dogri (NSD) National News Bulletin 09-05-2024

आकाशवाणी

- लोकसभा चुनावं दे बाकी बचे दे गेड़ें लेई चुनां प्रचार तेज होई गोआ ऐ।
- राष्ट्रपति द्रौपदी मुर्मू होर अज्ज राष्ट्रपति भवन च दुए समारोह च पद्म पुरस्कार भेंट करगंन।
- पाकिस्तान दे कब्जे आले जम्मू कश्मीर च तनोतनी बधी गई ऐ। लोक मेंहगाई ते सुरक्षाबलें दी तैनाती दा विरोध करा करदे न।
- मौसम विभाग नै राजस्थान ते मध्यप्रदेश च परतियै लूह चलने दी पेशनगोई कीती ऐ।
- आईपीएल क्रिकेट च जंदी रातीं हैदराबाद च खेड्डे गेदे मकाबले च सनराईजर्स हैदराबाद नै लखनऊ सुपर जायंटस गी 10एं विकेटें कन्नै हराई दित्ता ऐ।

<><><><><><>

Campaign

लोकसभा चुनावं दे बाकी बचे दे गेड़ें लेई चुनां प्रचार तेज होई गोदा ऐ। चौथे गेड़ तैहत 10एं राज्यें ते केन्द्र शासत प्रदेशें दी 96एं सीटें पर वोट पाए जाने न। हूकमरान पार्टी ते विरोधी घड़ें दे लीडर मतदाताएं गी अपने पाससै खिच्चने दे सब्बै जतन करा करदे न। तेलंगाना च बी चुनावं प्रचार जोरें-शोरें कन्नै चला करदा ऐ कीजे राज्य च 13 मई गी वोट पाए जाने न। लीडर अपने मेदवारें दे हक्क च वोट मंगा करदे न। बीजेपी दे वरिष्ठ लीडर ते केन्द्री गृहमंत्री अमित शाह होर अज्ज भोंगीर लोकसभा हल्के च प्रचार करगंन। कल भारतीय कांग्रेस कमेटी दे परिष्ठ लीडर राहुल गांधी होर बी अज्ज तेलंगाना च चुनावं प्रचार करगंन। ओह नरसापुर च जनसभा च शामिल होंगन ते संजा हैदराबाद कोल सरोर नगर च इक जलसे च भाषण देंगन। बी.आर.एस दे प्रमुख ते साबका मुख्मंत्री के.चन्द्रशेखर राय होर संजा करीमनगर च इक रोड शो करगंन।

<><><><><><>

Padma Awards

राष्ट्रपति द्रौपदी मुर्मू होर अज्ज दिल्ली च दुए लोक अलंकरण समारोह च पद्म पुरस्कार भेंट करगंन। देश दे सर्वोच्च सम्मान पद्म पुरस्कार त्रै श्रेणिएं च दित्ते जंदे न—पद्म विभूषण, पद्म भूषण ते पद्मश्री। कला, समाज सेवा, विज्ञान, उद्योग, बपार, दुआइयां, साहित्य, शिक्षा, खेड्ड ते लोक सेवा जनेह बक्ख—बक्ख क्षेत्रें च एह पुरस्कार दित्ते जंदे न। हर बरे इनें पुरस्कारें दी घोषणा गणतंत्र दिवस पर कीती जंदी ऐ। पिछले म्हीने राष्ट्रपति होरें 3 पद्म विभूषण, 8 पद्म भूषण ते 55 पद्मश्री पुरस्कार 22 अप्रैल गी भेंट कीते हे।

<><><><><><>

POJK

पाकिस्तान दे नजैज कब्जे आले जम्मू कश्मीर च हालात गंभीर बना'रदे न की जे पाकिस्तान प्रशासन नै इस थाहर पर 11 मई गी होने आले विद्रोह गी रोकने आस्तै पंजाब थमां सैनिक तैनात करना शुरू करी दित्ते न। तोआई यूनाइटेड कश्मीर पीपुल्स नैशनल पार्टी ते जायंट अवामी एक्शन कमेटी नै प्रशासन गी शांतिपूर्ण ढंगे कन्नै विरोध प्रदर्शन करने आले पर कुसै बी तरीके दी गलत कारवाई नेई करने दी हिदायत दित्ती ऐ। दौनें दलें आखेआ ऐ जे अगर विरोध प्रदर्शनकारिएं पर कुसै बी चाल्ली दे जोर दा इस्तेमाल करदा ऐ ते ओ एहूदे परते च अंतराष्ट्रीय विरोध प्रदर्शन करगंन की जे विरोध प्रदर्शनकारी अपनी जायज मंगें आस्तै सामने आए न। इक संयुक्त ब्यान च यूकेपीएनपी ते जेएएसी नै दस्सेआ ऐ जे प्रदर्शनकारी बिजली दे बिलें च मते हिजाफे, बधदी मैहगाई, जरूरत दी जीचें दी कमी, अनुचित टैक्स जनेह मुद्दें गी लेइयै विरोध प्रदर्शन करा'रदे न। एहूदे अलावा लोकें दी एहू बी मंग ऐ जे उनें मकामी जमीन दी मालकी ते पानी दे संसाधनें, पाक दे कब्जे आले जम्मू कश्मीर ते पाक दे कब्जे आले गिलगित—बल्तीस्तान दे बन्ने च बनने आली बिजली पर बी बसनीकें गी रॉयल्टी दित्ती जाए।

<><><><><><>

Jaishankar

विदेश मंत्री डॉ. एस.जयशंकर होरें आखेआ ऐ जे देश दा हर राजनीतिक दल पाकिस्तान दे नजैज कब्जे आले कश्मीर गी भारत कन्नै जोड़ने आले गी भारत कन्नै जोड़ने आस्तै वचनबद्ध ऐ।

नमीं दिल्ली च गार्गी कालेज दे छात्रें कन्नै गल्लबात करदे होई मंत्री होरें आखेआ जे जम्मू कश्मीर च दफा 370 हटने मगरा पाकिस्तान दे कब्जे आले कश्मीर दा मुद्दा लोकें दे सामने आया ऐं उनें आखेआ जे लोकें मन्नी लैता हा जे दफा 370 कदें बी हटी नेई सकदी, मगर मोदी सरकार दे फैसले बाद जमीनी स्तर पर हालात पूरी चाल्ली बदली चुके दे न। पाकिस्तान दे नजैज कब्जे आले कश्मीर गी लेइयै इक संसदीस प्रसताव रखेआ गेआ ऐ जेह्दे तैह्दत देश दी हर सियासी पार्टी नजैज कब्जें आले कश्मीर गी भारत कन्नै रलाने आस्तै वचनबद्ध ऐ। दफा 370 गी बीजेपी सरकार नै अगस्त 2019 गी हटाई दित्ता हा। तोआई पाकिस्तान दे नजैज कब्जे आले जम्मू कश्मीर च सियासी ते इंसानी हकूकें सरबंधी संगठनें 11 मई गी जलूस ते धरने दा ऐलान कीता ऐ जेह्दा मकसद लोकें दे जरूरी मसलें गी सुलझाने आस्तै आवाज चुक्कना ऐ।

<><><><><><><><>

IMD

मौसम विभाग नै आखेआ ऐ जे राजस्थान ते मध्यप्रदेश च गर्मी दा प्रकोप कल तोड़ी जारी रौह्ग। तटीय गुजरात च गर्मी ते उमस दा माहौल अगले 5 दिनें तोड़ी ते केरल, माहे च कल तोड़ी बनेदा रौह्ग। विभाग नै उत्तर-पूर्वी भारत च इस म्हीने दी 11 तरीक तोड़ी हल्की थमां दरमेयानी दर्जे दी बरखा पौने दी शेंका जताई ऐ। पच्छिम बंगाल, बिहार, झारखंड ते ओडिशा च अगले 4 दिनें चबदल गरजने कन्ने हल्की थमां दरमेयानी बरखा पर्ई सकदी ऐ। दक्खन भारत च बी तमिलनाडू, पुदुचेरी, आंध्रप्रदेश, तेलंगाना, केरल ते कर्नाटक च बी 12 मई ताड़ी बरखा पौने दी मेद ऐ।

<><><><><><><><>

Sixteenth Finace

16में माली कमीशन नै संदर्भ दी शर्ते दे कन्नै-कन्नै कमीशन आस्सेआ अपनाए जाने आले आम दृष्टिकोण दे बारे च आम जनता, दिलचस्पी रखने संगठनें थमां सुझाह मंगें न। माली कमीशनर दे कम्म कन्नै सरबंधत कुसै होर मुद्दे पर बी सुझाह मंगें गेदे न।

एह सुझाह 16में माली कमीशन दी वैबसाइट पर “Call for Suggestions” सैक्शन च दित्ते जाई सकदे न। राष्ट्रपति होरें संविधान दे नियमें दे मताबक 16में माली कमीशन दा गठन कीते दा ऐ। एहदे अध्यक्ष डॉ. अरविंद पनगढ़िया होर न।

<><><><><><>

ECI Special Polling

दिल्ली च रवा करदे कश्मीरी विस्थापत समुदाय दे लोकें गी लोकसभा चुनावें च वोट पाने लेई सहूलत उपलब्ध कराने लेई भारतीय चुनावें कमीशन नै राष्ट्रीय राजधानी दी बक्ख-बक्ख थाहरें पर खास मतदान केन्द्र बनाए न। आकाशवाणी जम्मू दे संवाददाता नै खबर दित्ती ऐ जे मतदान केन्द्र कश्मीर रेजीडेंस कमीशन, 5 पी.आर.रोड नमीं दिल्ली, कश्मीर किसान घर बी.आर.-2 शालीमार बाग दिल्ली, अरवाचीन इंटरनेशनल पब्लिक स्कूल पॉकेट-एफ, दिलशान गार्डन, दिल्ली ते पपरावत नजफगढ़ दिल्ली च बनाए गेदे न। चुनावें कमीशन नै इनें मतदान केन्द्रें पर वोट पाने आले कश्मीरी विस्थापतें गी मुफ्त ट्रांसपोर्ट दी सहूलत उपलब्ध कराने दे निर्देश दित्ते दे न। मतदान केन्द्रें तोड़ी पुज्जने ते वापस कैप च जाने लेई ट्रांसपोर्ट सेवा उपलब्ध कराई जाग। नमीं दिल्ली च AERO/ARO दा दफतर कश्मीरी विस्थापतें दी मदाद लेई कम्म करा करदा ऐ। दफतर नै इक हैल्प डैस्क बी बनाए दा ऐ। फार्म-एम ऑनलाइन ते ऑफलाइन तरीके कन्नै भरने, फार्म-12सी ते होरने जरूरी दस्तावेजें दे सरबंध च सहायता उपलब्ध कराई जा करदी ऐ। राजधानी च कश्मीरी विस्थापत मतदाताएं दे मतदान प्रतिशत च बाद्धा करने लेई बक्ख-बक्ख थाहरें पर जागरूकता कैप ते मीटिंगा लोआइयां जा करदियां न।

<><><><><><>

NIA JEM

राष्ट्रीय पढताली अजेंसी एनआईए नै कश्मीर च आतंकवाद दी घुसपैठ दे मामले च बंदशयाफता आतंकी संगठन जैशे-मोहम्मद दे इक सिरे दे उग्रवादी दी 6एं अचल जायदादें गी कुर्क करी दित्ता ऐ। अजेंसी नै इक ब्यान च आखेआ ऐ जे आतंकी आसिफ अहमद मलिक दी पुलवामा दे तीरपोरा च संपत्ति गी एनआईए दी जम्मू दी खास अदालत दे आदेश पर कुर्क कीता गेआ। इस आतंकवादी गी जनवरी 2020 गी गिरफ्तार कीता गेआ हा, ओहदे कोला फिआर ते गोला बरूद बी जब्त कीता गेआ हा।

मजूदा समें च ओहदे पर एनआईए दी विशेष अदालत जम्मू च मुकदमा चला करदा ऐ। एह मामला आतंकवादिएं गी ट्रांसपोर्ट सहूलत मुहैया कराने, बन्ने पारा थमां धुसपैठ कराने ते थेआर ते असला बरूद बरामद होने कन्नै जुड़े दा ऐ।

<><><><><><>

Uttarakhand Fire

राज्य च जंगलें च अग्ग लगने दे हालात दे चलदे उत्तराखंड दे मुख्मन्त्री पुष्कर सिंह धामी होरें रूद्रप्रयाग च “पीरूल लाओ पैसे पाओ” अभियान दी कल शुरूआत कीती। रूद्रप्रयाग जिले च चीड़ें दे पत्तरें-पीरूल गी साफ करने दे अभियान च मुख्मन्त्री होरें बी हिस्सा लैता ते लोकें गी आखेआ जे ओ “पीरूल लाओ पैसे पाओ” अभियान दा हिस्सा बनियै जंगलें च लगने आली अग्ग गी रोकी सकदे न। ग्राई लोकें ते नोजवानें थमां पीरूल दे पत्तें किट्ठे कीते जांगन, उंदा भार कीता जाग ते तैहशुदा पीरूल कोलैक्शन सेंटर पर रखे जांगनं भार दे मताबक 50 रपे किलो दे साब्बै पत्तें दे भार किट्ठे करने आले दे बैंक खाते च ऑनलाइन राएं तौले गै पाए दित्ते जांगन। पीरूल कोलैक्शन सेंटर एसडीएम दी नजरसानी च तैहसीलदार अपने क्षेत्र च तैआर करोग। लोकें कोला हासल पीरूल दे पत्ते गी पैक करियै फ़ैक्ट्रीएं च पजाया जाग। चीड़ दे बूहटें दी चुंज आले हिस्सो गी उत्तराखंड च पीरूल आक्खदे न।

<><><><><><>

IPL

आईपीएल क्रिकेट च जंदी रातीं हैदराबाद दे राजीव गांधी अंतर्राष्ट्रीय स्टेडियम च खेड्डे गेदे इक मैच च सनराईजर्स हैदराबाद नै लखनऊ सुपर जायंटस गी 10एं विकटें कन्नै हराई दित्ता। पैह्ले बल्लेबाजी करदे होई लखनऊ सुपर जायंटस नै तैह 20एं ओवरें च 4 विकटें दे नुक्सान पर 165 रंज बनाए। एहदे परतै च सनराईजर्स हैदराबाद नै सिर्फ 9 ओवरें ते 4 गेंदें च गै बगैरा कुसै नुक्सान दे 167 रंज बनाइयै मैच जित्ती लैता। अभिशोक शर्मा ते ट्रैविस हैड दी सलामी जोड़ी नै नाबाद 75 ते 89 रंज बनाइयै लक्ष्य गी बड़ी असानी कन्नै हासल करी लैता। अज्ज धर्मशाला च पंजाब किंग्स ते रॉयल चैलेंजर्स बेंगलोर बश्कार मैच होग, मैच संजा साढ़े 7 बजे शुरू होग।

<><><><><><>